

“138778xxxxx, dienhvah daeuj lo! 138778xxxxx, dienhvah daeuj lo!”

Baez dingqnyi soujgih yiengj, gou caemxsax cuengq hong ndaw fwngz, daj ndaw daeh mbonq ok soujgih daeuj ciep.

Dwg daxmeh dwk daeuj, gou muengz naenx aen gen ciepdinq, soujgih baihaenx couh cienz daeuj sing daxmeh.

“Dwg golaux lwi? Gou dwg daxmeh ha, mboengqneix nyaengq lwi?” Aenvih youq doih lwg ndaw ranz gou, gou dwg golaux, ndigah daxmeh coengzlaiz cungj heuh gou golaux.

“Yaxndei, mbouj suenq nyaengq lai. Daxmeh, ranz miz gijmaz saeh lwi?” Gou cam.

“Yax mbouj suenq dwg saehgip, hoeng, gij saeh neix, yaek caeuq mwngz doxyaeng cij ndaej.” Daxmeh naeuz.

“O, dwg maz saeh, mwngz gangj ba!” Gou hannaueuz.

“Dwg yienghneix, daeg nuengx–yot mwngz gaenq gangj bawx baenz lo, dou siengj youq geij ngoenz neix naemj guh saeh caijmwnz, daengzcwz mwngz yut seizgan ma ranz doxyaeng baenzlawz banh cix ndei.” Daxmeh naeuz.

Neix dwg aen siusik angq ndeu ha. Gou angq dwk sikhaek han daxmeh naeuz: “Meh, mwngz cuengq–sim, gou daengzseiz itdingh baema ranz !”

Cuengq soujgih le, ndawsim gou youh mizdi yawjlaep hwndaeuj. Mbouj dwg aenvih daegnuengx banh caij–mwnz sai cienz, gou yawjlaep baema ranz, cix miz leixyouz gou. Daih’ it, aenvih diuz loh baema ranz haenx, miz duenh ndeu dwg loh luegbya, gumzgamx mbouj bingz, hoj byaij lai. Duenh loh neix yienznaeuz mbouj suenq raez, vunz byaij roxnaeuz civaiz byaij, diemj lai cung couh byaij daengz ranz lo, hoeng, hai ci couh aeu saek song diemj cung cix ndaej. Aenci youq gwnz loh byaij, seiz hwnj seiz roengz, diuqbugbug, naengh youq ndaw ci, dungx fan saej geuj liux, hojsouh dangqmaz. Daihngleih, ranz–mbanj uq lai. Vunz youq ndawsingz youq gvenq le, cungj maij guhseuq. Ndawsingz gwnzgai seuq, ndaw ranz seuq, buhvaq gwnz ndang seuq, couh



dwg aen veiswnghgenh ndaw ranz hix seuq. Lajmbanj couh mbouj doengz lo. Youq lajmbanj, ca mbouj lai gizgiz uqlah. Yienznaeuz seizneix lajmbanj ranzlaeuz hausag daengj baenz rangz, ndawranz hix gig seuq. Hoengq, diuzroen gyangmbanj couh cuet lai lo. Ngoenzrengx lij ndei di, baez bungz daengz ngoenzfwn, daegbied dwg mboengq doek fwnmoenq, diuzroen gyang mbanj, yaek ra giz cuengq yamqdin cungj hoj, dauqcawq dwg naezboengz, dauqcawq dwg haexvaiz haexcwz, uq ndaej vunz yawjraen le yaek rug bae. Diuz mieng iqet gyang mbanj haenx, aenvih baiz raemx

caeuq vut nyapnyaj haeuj ndaw lai, bienqbaenz diuz mieng haeusaeng ndeu, nyungz byuz nyungz douh, ndeirueg dangqmaz.

Yawjlaep gvi yawjlaep, wnggai baema cix yaek baema, cungj mbouj ndaej gangj yawjlaep ranzmbanj cix mbouj baema. Byawz hawj mwngz dwg vunz lajmbanj, byawz hawj diegcoj mwngz dwg lajmbanj ne?

Ngoenzndei ciuqseiz daeuj daengz. Ngoenzhaenx, daxmeh youh dwk soujgih gou, coi gou daengx ranz vunz vaiq ganj maranz. Dwk dienhvah sat, gou daengx ranzvunz sam boux ganj baema ranzcoj. Gou hai aen ci

gou, daj yienhsingz daengz ndaw yangh dou, itloh lij suenq swnhleih, daihgaiq banringz cibngeih diemj cung couh ma daengz ndaw yangh dou lo. Youq gwnz haw ndaw yangh, dou roengz ci daeuj cawx doxgaiq le, couh caemxsax ganj loh baema ranz, gou rox, ganj caeux beij ganj haemh ndei, aenvih duenh loh daj ndaw yangh baema mbanj gou, loh rwix loh yak, gumzgumz gamxgamx, gangj mbouj dingh, mbouj rox daengz gizlawz ci baez deng gaz, couh cuet lo.

Lau gijmaz, daeuj gijmaz, caen dahraix, ci ngamq hai ndaej sam seiq goengleix gyae, dinglingz bungz aen gouhguh baij youq gwnz loh gaeu namh. Seizhaenx, gou baez dungx–mbaeu hemq hwnjdaeuj: “Dai lo, dai lo, baezneix caen dwg gyangngoenz bungz duzfanzraq lo. Ngoenzneix goulau cix ganj mbouj daengz ranz lo, yaek youq gwnz loh gvaqhaemh lo.”

Yah lwg dingq gou baenzneix hemq, hix da yawjmyoengmyoeng, mbouj rox gangj gijmiz vah cij ndei. Gou roengzci daeuj, byaij coh aen gouhguh bae, saefouh hai gouhguh yawjraen gou le, dingz hong roengz–daeuj, riunyumnyum doiq gou gangj: “Mbouj ndei eiqsei lo, mboengqneix cingq ganj coih diuzloh neix, hawj sou gyoengqboux baihrog ma ranz mbouj fuengbienh lo.” (caengz sat)

## Fwen Danq Dangj Hungmbwk

### 歌唱伟大的共产党

□ Suh Dasingh/苏大星

Song cien lingz cib haj  
Raeuz caj daengz biyiengz  
Gvaq cieng van lumj diengz(dangz)  
Ciengq go youh diuq foux

Gaijfang roekroek bi  
Guek bienq ndi lumj veh  
Baengh guekcoj daxmeh  
Gej ndei gwndaenj raeuz

Gungcanjdangj dazyinx  
Yinxminz ndaej vuenyungz  
Mbouj lumz mwhnduj gungz

Miemh cingz hung daengznauq

Gijgenj veiyei naeuz  
Dangjfungh aeu lenzcwng  
Fanj fujbai doucwnggh  
Fwngz gaem cungj mbouj cuengq

Fanjfuj youq gwnzroen  
Ngoenzngoenz byaij baenaj  
Roeb guk couh aeu gaj  
Daj dai gyoengq nengznayen

Bi moq giva moq  
Suengsoq cij danggya

Gak nieb caez hai va  
Guekgya doh fanzyungz

Gaijgwz aeu haeujlaeg  
Gaihfang yaek mbe’ gvangq  
Doenghva caez hailangh  
Mauxdan angj Cunghvaz

Gvaq cieng diensiengq moq  
Simcingz doh angqyangz  
Gak cuz caez ndwn sang  
Fwen danq dangj hungmbwk

Gvaq cieng gwn caeuzngaiz  
Mbouj ndaej sai haeuxbyaek  
Gaenx mbaet eiqsei laeg  
Hwnj mbaek meijdwz sang

Siengjmuengh Cungguek raeuz  
Aeu byaij haeuj siujganh  
Byaij riengz Gungcanjdangj  
Mbwn sang goj bae daengz

Daj ndwen 11 hwnj, Veiz Goz–cingh mboujduenh deng “laegdingh” ciepraen vunzlai roxnaeuz ciepsouh baebuenq, caemhcai song baez daihyauj Gihdangjveij youq Nanzningz Yinzminz Gunghyenz banh gij hoihcomz hung gwnzde guh genjcaz. Hoeng vunzlai cungj mbouj hawj de doenggvaq, de saedcaih nanz lijgaij.

Bi 1967 ndwen 1, Gveilinz baij–cauhfanj genhciz aeu Veiz Gozcingh bae Gveilinz guh genjcaz, danghnaeuz Veiz Gozcingh mbouj bae, gyoengqde cix rag gij doih hung daengz Nanzningz. Gak dieg baijcauhfanj, caemh cungj haep naeuz yaek bae Nanzningz doxcomz, baebuenq aen Swcigih Dangjveij yungh Veiz Goz–cingh、Gyauz Yaujgvangh guh daihyauj haenx hengzguh gij loh sienq fanjdoengh swchanjgaih giz gyoengqde laih haenx. Veiz Gozcingh gamjdaengz cingzgvang youqyaenj lai, daihbang

vunz yaep ndeu cix doxcomz youq Nanzningz, lau Nanzningz souh mbouj ndaej. De gietdingh daiq bingh bae Gveilinz guh genjcaz, it siengj bang Nanzningz gemjap, ngeih siengj bang gak gaep lingjdauj rap di cwzyin.

De yawjraen gak gaep lingjdauj ganbu deng rag bae baedaeuq, daenj mauhsang youzgai okcouj, deng hangz deng vaihnaj, sim gig in. De caeuq Gyauz Yaujgvangh daengj vunz naeuz: “Guengjsae guh hong miz vwndiz, cujyau dwg raeuz miz vwndiz, vihmaz

hawj baihlaj caemh souhcoih ne?”

Seizhaenx, binghgaeuq de gaenq fukfat, mbanj cangzveij cungj yienq de gaej bae lo. De cix gangjifug daihgva, daj daengxbuenz Guengjsae bae naemj, mbouj goq bonjfaenh ancienz, lienzhaemh daiq bingh naengh cigizbuj bae Gveilinz.

Baez daengz Gveilinz, Veiz Gozcingh saedcaih cengq mbouj ndaej lo, gyaeuj ngunh da raiz, cijndaej ninz mbonq. Couh Wnhlaiz cunglij dwk dienhvah bae Gveilinz ra de, de hwnq

mbouj ndaej, cunglij cix daengq vunz cuengq dienhvah youq gyaeujmbonq de. Cunglij cam Veiz Gozcingh vih–maz bae Gveilinz? De cix ciuq saehsaed gangj hawj cunglij nyi. Cunglij cam: “Byawz gaem hong Nanzningz?” De naeuz dwg Gyauz Yaujgvangh gaem. Cunglij daengq de aeu rendang ndei, lij naeuz guh genjcaz hawj vunzlai goj aeu caj bingh ndei di le caiq bae guh ma! De gig docih cunglij gvansim caeuq gyaez–hoh de. (caengz sat)

## Veiz Gozcingh Sangcieng Cawj–guenj Guengjsae Ngeihcib Bi

### 韦国清上将主政广西二十年

□ Hoz Saubangj sij Cinz Siengzcouh Liuz Gingliuj Cinz Siengzgen hoiz